



Conradus Tiguri apud Heluetios honestis sed tenuis fortunæ parētibus natus est, anno 1516. Ibi cum felici ingenio esset præditus, ab auunculo sacerdote rei herbariæ perito prima literarum rudimenta didicit, atq; in Latinis & Græcis literis Osualdum Myconium, Petrum Dasipodiũ, Theodorum Bibliandrum, Ioannem Iacobum Amianũ, & Rodolphũ Collinum præceptores habuit, amplissimo senatu Tigurino annum stipēdium liberaliter offerēte, quò suam necessitatem subleuare, ac studijs uacare posset. Cum hoc modo adoleuisset, Argentinã descendit, atq; aliquãdiu D. Vuolfgangi Capitonis famulus fuit, ubi etiam ab eo Hebraicæ linguæ cognitionem adeptus est. Postea in Galliam profectus, Bituribus nobiles aliquot adolescentes in Græca & Latina lingua per annum instituit. altero deinde anno Lutetiã permansit & priuatis ferè studijs contētus fuit. In primis autem tum Philosophiæ, rei herbariæ, & arti Medicæ incubuit, atq; in ijs mutis tantum præceptoribus adiutus plurimum profecit. Domum è Gallia reuersus iuuenis uxorem duxit, atq; pueros in schola per annum docuit. Inde Basileam uenit, & per annum rei medicæ ea in Academia præclarã operam nauauit, ita tamen ut simul aliqua pro typographo, se & uxorē sustentandi gratia, conscriberet. Inde Losannam uocatus, per triennium Græcas literas docuit, atq; cunctis gratissimus fuit. Postea rursus in Galliam profectus Monspeffulum peruenit, atq; Medicinæ inquirendæ causa per aliquot annos ibidem permansit. Ex eo loco Basileam reuersus suam doctrinam declarauit, atq; omnium applausu Doctoralia insignia sibi comparauit, & tandem Tigurum in patriam redijt.